

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10 i 3/23), na prijedlog Ministarstva zdravstva, Vlada Zeničko-dobojskog kantona, na 115. sjednici, održanoj 30.01.2026. godine, d o n o s i

ZAKLJUČAK

o davanju saglasnosti na Protokol o vođenju pregovora radi pregovaranja i zaključivanja Kolektivnog ugovora o pravima i obavezama poslodavaca i radnika u djelatnosti doktora medicine i stomatologije na području Zeničko-dobojskog kantona

I

Daje se saglasnost na Protokol o vođenju pregovora radi pregovaranja i zaključivanja Kolektivnog ugovora o pravima i obavezama poslodavaca i radnika u djelatnosti doktora medicine i stomatologije na području Zeničko-dobojskog kantona.

II

Ovlašćuju se:

- dr Aida Salčinović, ministrica Ministarstva zdravstva Zeničko-dobojskog kantona, Ahmed Kasap, V.D. direktor Zavoda zdravstvenog osiguranja Zeničko-dobojskog kantona, dr Tarik Zulović, direktor Kantonalne bolnice Zenica i Mirnes Burkić, sekretar Sekretarijata za zakonodavstvo, da kao ovlašteni pregovarači u ime Vlade Zeničko-dobojskog kantona, sudjeluju u pregovorima i potpisivanju zapisnika o pregovorima, radi pregovaranja i zaključivanja Kolektivnog ugovora iz tačke I ovog zaključka.
- Ovlašćuje se ministrica Ministarstva zdravstva dr Aida Salčinović da angažuje i druge stručne kadrove, radi stručnih konsultacija.

III

Ovaj zaključak stupa na snagu danom donošenja.

Broj: 02-_____/26
Datum, 30.01.2026. godine
Zenica

PREMIJER

Nezir Pivić

DOSTAVLJENO:

- 1x Ministarstvo zdravstva,
- 1x Ovlašteni, putem Ministarstva,
- 1x Ministarstvo za pravosuđe i upravu,
- 1x a/a.

PRIJEDLOG

U skladu sa članom 139. Zakona o radu („Sl. novine FBiH“, broj: 26/16, 89/18, 44/22 i 39/24) predstavnici ugovornih strana:

1. Vlada Zeničko-dobojskog kantona, zastupana po ministrici Ministarstva zdravstva dr Aidi Salčinović, s jedne strane i
2. Samostalni strukovni sindikat doktora medicine i stomatologije Zeničko-dobojskog kantona, zastupan po predsjedniku dr Elvisu Cikotiću, s druge strane,

u Zenici, dana __.__.2026. godine zaključuju:

PROTOKOL

o vođenju pregovora radi pregovaranja i zaključivanja Kolektivnog ugovora o pravima i obavezama poslodavaca i radnika u djelatnosti doktora medicine i stomatologije na području Zeničko-dobojskog kantona

Član 1.

Ovim Protokolom ugovorne strane definišu postupak i rokove za pregovore, radi pregovaranja i zaključivanja Kolektivnog ugovora o pravima i obavezama poslodavaca i radnika u djelatnosti doktora medicine i stomatologije na području Zeničko-dobojskog kantona (u daljem tekstu: Kolektivni ugovor).

Član 2.

- (1) Pregovori radi pregovaranja i zaključivanja Kolektivnog ugovora, vode se prema prijedlozima obje ugovorne strane.
- (2) Pregovori iz stava (1) ovog člana, otpočinju od dana potpisivanja ovog Protokola.
- (3) Ugovorne strane su saglasne da je okvirni rok za vođenje pregovora u vezi pregovaranja i zaključenja Kolektivnog ugovora 45 dana, u skladu sa članom 139. stav 3. Zakona o radu.
- (4) Rok za pregovaranje iz stava (3) ovog člana, može se produžavati, ako se o tome pismeno usaglase ugovorne strane.
- (5) Ugovorne strane su saglasne da, ukoliko se u roku iz stava (3) ovog člana, odnosno u produženom roku iz stava (4) ovog člana ne postigne saglasnost za zaključivanje kolektivnog ugovora, odluku o nastavku pregovora donijet će nadležni organi Samostalnog strukovnog sindikata doktora medicine i stomatologije Zeničko-dobojskog kantona, s jedne strane i Vlade Zeničko-dobojskog kantona, s druge strane.

Član 3.

- (1) Ugovorene strane su obavezne pregovarati u dobroj vjeri u predmetu pregovora i učiniti razumne napore da pregovori budu uspješno okončani u planiranom roku, te se suzdržati od radnji koje bi za cilj imale neopravdano odugovlačenje pregovaračkog postupka.
- (2) Mjesto i vrijeme održavanja pregovaračkog sastanka ugovorene strane će dogovoriti sporazumno na kraju svakog sastanka.

Član 4.

Ugovorne strane mogu angažovati stručnjake u svojstvu savjetnika, koje prisustvuju sjednicama ugovornih strana bez prava odlučivanja.

Član 5.

Potpisivanjem ovog Protokola ugovorne strane izjavljuju da njihovi predstavnici koji će voditi pregovore iz člana 2. ovog Protokola, imaju ovlaštenje o vođenju pregovora.

Član 6.

Ugovorne strane su obavezne voditi zapisnik o toku pregovora koji obostrano potpisuju.

Član 7.

- (1) Ugovorne strane se obavezuju da čuvaju kao službenu tajnu sve podatke, informacije, kao i dogovorene prijedloge tokom vođenja pregovora saglasno ovom Protokolu.
- (2) Ugovorne strane se obavezuju da tokom vođenja pregovora saglasno ovom Protokolu neće istupati u javnost u sredstvima javnog informisanja.
- (3) Obaveza čuvanja službene tajne, kao i obaveza neistupanja u javnost u sredstvima javnog informisanja iz stava (1) i (2) ovog člana odnosi se i na osobe iz člana 4. ovog Protokola.

Član 8.

- (1) Ovaj Protokol se smatra zaključenim kada ga u istovjetnom tekstu potpišu ugovorne strane.
- (2) Ovaj Protokol je sačinjen u 4 (četiri) istovjetna primjerka, od kojih po 2 (dva) primjerka zadržavaju ugovorne strane.

Vlada Zeničko-dobojskog kantona
zastupana po ministrici Ministarstva zdravstva

dr Aida Salčinović

Samostalni strukovni sindikat
doktora medicine i stomatologije
Zeničko-dobojskog kantona

dr Elvis Cikotić

Broj: _____

Dana: __.__.2026. godine